

**Miontuairiscí ón 17ú cruinniú den Fhóram Comhpháirtíochta Dé Céadaoin 6
Aibreán 2016 in oifig Ghlór na nGael, Ráth Chairn, Co. na Mí.**

- I láthair:** Antoine Ó Coileáin (Gael Linn), Caitríona Ní Cheallaigh (Cumann na bhFiann), Julian de Spáinn (Conradh na Gaeilge), Lorcán Mac Gabhann (Glór na nGael), Liam Ó Maolaodha (Oireachtas na Gaeilge) agus Nóra Ní Loingsigh (Gaelscoileanna).
- Ag freastal:** Seán Ó Coinn (Cathaoirleach an Fhórait & Foras na Gaeilge), Éamonn Ó hArgáin (Foras na Gaeilge), Steph Uí Choinne (Rúnaí an Fhórait) agus Dónall P. Ó Baoill (Comhairleoir Pleanála Teanga).
- Leithscéal:** Bláthnaid Ní Ghréacháin (Gaelscoileanna) agus Regina Uí Chollatáin (An Fóram Forbartha Teanga).

Clár an chruinnithe a aontú

1. Aontaíodh ar chlár an chruinnithe. Aontaíodh go gcuirfí ócáid chomórtha 2016 (Féasta 2016) ar an chlár agus go ndéanfaí plé air sin ag deireadh an chruinnithe. Rinneadh comhghairdeas le Ceannasaí Chonradh na Gaeilge ar bhreith a mhic nua.

Miontuairiscí ón 3 Feabhra 2016 agus nithe ag éirí astu

2. Glacadh leis na miontuairiscí ón 3 Feabhra 2016. Cuireadh in iúl go raibh G. Trimble chun labhairt faoin mheitheal maoinithe agus faoi théarmaí tagartha na meithle inniu.
3. Rinneadh tagairt don dá mheamram comhthuisceana a bhain le Forbairt na Gaeilge ag Leibhéal an Phobail agus Tógáil Teaghlaigh le Gaeilge agus cuireadh in iúl go raibh siad pléite ag na boird stiúrtha uile agus go raibh siad sásta leo. Aontaíodh go ndéanfaí plé ar na meamraim arís níos faide sa bhliain agus go dtiocfadh treoir ó Cheannasaí Ghlór na nGael ina leith.
4. Ardaíodh ceist faoin cháipéis Excel a bhí le cur ar fáil ag Cumann na bhFiann agus cuireadh in iúl go scaipfí sin ar na Ceannasaithe le go dtig leo a n-eolas féin a chur léi. Aontaíodh go mbeadh sé ina chuidiú don phobal an t-eolas sin a fheiceáil le go mbeidh a fhios acu cad iad na háiteanna a bhfuil Ceanneagraíochtaí gníomhach.
5. Rinneadh tagairt do na feidhmeanna agus na moltaí a bhí faighte ina leith ó roinnt Ceanneagraíochtaí. Míníodh go raibh athbhreithiú le déanamh ar na feidhmeanna agus go mbeadh faomhadh Bhord Fhoras an Gaeilge le fáil ina leith. Cuireadh in iúl go mbeadh na moltaí faoi bhráid an Choiste Forbartha ar tús agus faoi bhráid Bhord Fhoras na Gaeilge ansin i mí Iúil. D'iarr an Cathaoirleach go gcuirfí moltaí na gCeanneagraíochtaí ar fáil faoi dheireadh na míosa.
6. Rinneadh tagairt do na ceardlanna a bhí Foras na Gaeilge ag iarraidh a eagrú agus cuireadh in iúl go mbeadh ceardlann ar an phleanáil teanga ar 28 Aibreán. Míníodh go lorgófaí tairiscintí i mí an Mheithimh don dara ceardlann a bheadh dírithe ar fheidhmíocht foirne agus eagraíochtúil. Míníodh go raibh sé tábhachtach go ndéanfadh an oiread daoine agus is féidir ó na Ceanneagraíochtaí freastal ar na ceardlanna. Cuireadh in iúl go raibh roinnt Ceanneagraíochtaí i ndiaidh dul thar a dteorainn maidir le costais taistil i

ngeall ar chiorruithe áfach agus nach mbeadh gach fostaí in ann freastal ar na ceardlanna dá réir.

Gníomh: Cáipéis Excel le scaipeadh ar na Ceanneagraíochtaí.

Gníomh: Moltaí ar na feidhmeanna le cur ar fáil d'Fhoras na Gaeilge.

Pleanáil don am atá le teacht i bhfianaise ciorruithe

7. Pléadh an cheist maidir le ciorruithe ar bhuiséad Foras na Gaeilge agus ar bhuiséid na gCeanneagraíochtaí faoi seach. Míníodh gurbh fhéidir buiséad Foras na Gaeilge a roinnt ina thrí chuid; is é sin trian amháin do chostais foirne/reatha, trian eile do dheontais/scéimeanna agus trian eile do na Ceanneagraíochtaí (tuairim ar €5m i ngach trian). Aithníodh nach dtiocfadh costais foirne agus reatha sna Ceanneagraíochtaí a ísliú mórán, rud a d'fhág go mbeadh an chuid is measa de na ciorruithe le cur i bhfeidhm ar scéimeanna deontais Foras na Gaeilge, agus ar chláir oibre na gCeanneagraíochtaí. Moladh go gcuirfeadh Foras na Gaeilge cáipéis le chéile maidir le himpleachtaí na gCiorruithe buiséid ó tosaíodh a chiorrú bhuiséad Foras na Gaeilge a léireodh drochéifeacht na gCiorruithe sin ar phleananna gnó. Cuireadh in iúl go mbeadh na Ceannasaithe ag lorg cruinnithe leis an dá Aire, thuaidh agus theas, chun ceist na gCiorruithe a phlé.
8. Cuireadh in iúl go raibh na deontais a bhí ag na Ceanneagraíochtaí faoi láthair róbheag leis na costais uilig a chumdach. Cuireadh in iúl gur costas seasta a bhí i gceist le costais tuarastail, ach go mbeadh ócáidí a chaithfí a chur ar ceal dá mbeadh tuilleadh ciorruithe le cur i bhfeidhm. Cuireadh in iúl go mbeadh gearradh le déanamh ar fhostaíocht in eagraíochtaí agus go gcaillfí poist dá réir sin. Cuireadh in iúl nach bhféadfaí feidhmeanna na gCeanneagraíochtaí a chomhlíonadh ina n-iomláine dá gcaillfí poist agus nárbh fhéidir cláir oibre a chur i gcrích dá leanfadh na ciorruithe ar aghaidh. Cuireadh in iúl go raibh Ceanneagraíocht ann ina raibh dhá fholúntas foirne, agus go raibh plé a dhéanamh faoi gan na folúntais a líonadh i ngeall ar na ciorruithe reatha agus i ngeall ar an bhagairt a bhain le ciorruithe breise in 2017.
9. Pléadh cumhdach na meán ar na ciorruithe ó tosaíodh a ghearradh buiséad Foras na Gaeilge in 2009. Ardaíodh ceist faoi na himpleachtaí a bhain leo, agus i leith an dochair a bhí déanta acu cheana féin.
10. D'iarr an Cathaoirleach ar na Ceanneagraíochtaí bheith ag plé le chéile faoi bhealaí le coigiltí a dhéanamh trí bheith ag obair i gcomhpháirt le chéile, agus le bheith ag plé bealaí le cur lena maoiniú, cuir i gcás trí tháillí a ghearradh ar imeachtaí.

Gníomh: Cáipéis le cur le chéile ag Foras na Gaeilge a léireodh éifeacht na gCiorruithe.

Gníomh: Cruinniú le lorg ag na Ceannasaithe leis an dá Aire.

Tuairisc ón Sainchomhairleoir Pleanála Teanga

11. Thug an Sainchomhairleoir Pleanála Teanga cur i láthair. Mhol sé go dtiocfadh daoine ó na Ceanneagraíochtaí le chéile chun ceist stádais agus taighde a phlé. D'ardaigh sé ceist i leith polasaí teanga a bheith ag an Fhóram le tacú lena bpleananna.

12. Ghabh an Cathaoirleach buíochas leis an Sainchomhairleoir as an chur i láthair a thabhairt. Cuireadh in iúl go mbeadh an Sainchomhairleoir ar fáil le breathnú ar fheidhmeanna na gCeanneagraíochtaí. D'iarr sé ar na Ceannasaithe bheith i dteagmháil leis le plé a dhéanamh ar an bhealach is fearr le leas a bhaint as a chomhairle. Aontaíodh go ndéanfadh na Ceannasaithe uilig teagmháil leis ina leith seo.

Gníomh: Cur i láthair an tSainchomhairleora Pleanála Teanga le cur sa Dropbox.

Gníomh: Ceannasaithe le bheith i dteagmháil leis an Sainchomhairleoir Pleanála Teanga.

Cur i láthair ar Ravelóid

13. Tháinig A. Ó Deá i láthair an chruinnithe agus thug sé cur i láthair ar Ravelóid. Chuir sé in iúl a thábhachtaí a bhí poiblíocht anois agus dáta na hócáide ag druidim linn. D'iarr sé ar na heagraíochtaí uilig bheith páirteach san fheachtas poiblíochta agus úsáid a bhaint as a gcuid líonraí teagmhála.

Cur i láthair ar an Straitéis Léitheoireachta

14. Tháinig S. Ní Dhuinn i láthair an chruinnithe agus thug sí cur i láthair ar Straitéis Léitheoireachta Fhoras na Gaeilge. Léirigh Ceannasaithe an-spéis sa Straitéis Léitheoireachta agus moladh féidearthachtaí maidir le veáin COGG nó veáin Fhoras na Gaeilge le cuairt a thabhairt ar na coláistí samhraidh agus gréasáin a chothú leo. Moladh go ndéanfaí úsáid de na líonraí a bhí ag Ceanneagraíochtaí de dhaoine le hard-chumais litearthachta sa Ghaeilge le nósmaireacht na léitheoireachta Gaeilge a chothú ina measc.

Gníomh: Teagmháil le déanamh le S. Ní Dhuinn faoi na líonraí teagmhála sna Ceanneagraíochtaí.

Meitheal maoinithe

15. Tháinig G. Trimble i láthair an chruinnithe agus thug sé cur i láthair ar mheitheal maoinithe na gCeanneagraíochtaí. Scaip sé cóip de théarmaí tagartha na meithle agus bhí plé ina leith. Aontaíodh ar roinnt mionleasuithe ar na téarmaí tagartha. D'iarr an Cathaoirleach ar na Ceannasaithe bheith ag smaoinreamh ar thograí féidearthacha don chéad chruinniú eile den mheitheal maoinithe ar 12 Bealtaine.

Gníomh: Téarmaí tagartha na meithle maoinithe le leasú.

Gníomh: Moltaí le haghaidh tograí le hullmhú don chruinniú den Mheitheal ar an 12 Bealtaine.

Cur i láthair ar thuairisc chéad ráithe 2016

16. Thug na Ceannasaithe cur i láthair ar a dtuairiscí chéad ráithe do 2016 agus bhí plé ina dhiaidh.
17. Threásláigh an Cathaoirleach do na Ceannasaithe as an obair ar fad a bhí ar siúl acu. D'iarr sé ar na Ceannasaithe cóip den chur i láthair a chur sa Dropbox le go dtig a thaispeáint do Bhord Fhoras na Gaeilge go bhfuil luach ar airgead á fháil agus go bhfuil an Bord ar an eolas faoin obair ar fad atá ar siúl.

Gníomh: An cur i láthair le cur sa Dropbox.

Tuairisc ar dhul chun cinn sa chomhpháirtíocht do 2016

18. Aontaíodh go gcuirfí plé ar an mhír sin siar go dtí an chéad chruinniú eile agus go mbeadh sé mar phríomhmhír ar chlár an chruinnithe. Mhol an Cathaoirleach gurbh fhiú do Cheannasaithe teacht i gceann a chéile taobh amuigh den Fhóram Comhpháirtíochta, chun ceist na comhpháirtíochta a phlé roimh an chruinniú.

Gníomh: Ceanneagraíochtaí le teacht i gceann a chéile taobh amuigh den Fhóram roimh an chéad chruinniú eile.

Ceardlanna

19. Chuir an Cathaoirleach in iúl go mbeadh Foras na Gaeilge ag eagrú ceardlann pleanála teanga ar 28 Aibreán dá n-oifigigh féin agus d'oifigigh na gCeanneagraíochtaí, agus go ndéanfaí úsáid de leabhar Laoise Ní Dhubhda ar an lá. Moladh gurbh fhiú aoichainteoir a bheith ann. Rinneadh roinnt moltaí. Aontaíodh gurbh fhiú eolas a scaipeadh roimh ré ar na daoine a bheadh i láthair ar an obair a dhéanann na Ceanneagraíochtaí éagsúla.

Gníomh: Eolas le cur ar fáil d'Fhoras na Gaeilge maidir leis an obair a dhéanann gach Ceanneagraíocht le gur féidir cáipéis a chur le chéile don cheardlann.

Aon ghnó eile

20. Cuireadh in iúl go raibh an coiste ag ullmhú na dticéad d'ócáid chomórtha 1916 (Féasta) i mí na Nollag. Cuireadh in iúl go raibh litir le cur chuig Uachtarán na hÉireann le cuireadh a thabhairt dó freastal ar an ócáid. Shínigh gach Ceannasaí an litir agus cuireadh cóip chuig Príomhfheidhmeannach Fhoras na Gaeilge le síniú agus le cur ar aghaidh dá réir.

21. Moladh go ndéanfadh Foras na Gaeilge cur i láthair ar a thosaíochtaí ar an chéad chruinniú eile den Fhóram.

Gníomh: Foras na Gaeilge le cur i láthair a ullmhú don chéad chruinniú eile.

Aguisín

Ina dhiaidh seo tá cóipeanna de na tuairiscí a thug Conradh na Gaeilge; Gael Linn; Gaelscoileanna; Glór na nGael agus An tOireachtas don Fhóram Comhphairtíochta faoin gcéad ráithe in 2016.